



**KENYATAAN AKHBAR  
KEMENTERIAN KESIHATAN MALAYSIA**

**PRODUK-PRODUK KOSMETIK YANG DIKESAN MENGANDUNGI RACUN  
BERJADUAL**

1. Bahagian Regulatori Farmasi Negara (NPRA), Kementerian Kesihatan Malaysia (KKM) ingin menggesa orang awam untuk mengelak daripada membeli dan menggunakan produk-produk kosmetik berikut kerana dikesan mengandungi racun berjadual seperti di bawah:

Bil.	Nama Produk	Racun Berjadual Yang Dikesan
1.	Beauty Sleep Treatment Cream	Hydroquinone dan Tretinoin
2.	Beauty Sleep Nite Cream	Merkuri
3.	Lana Radiance Night Cream	Hydroquinone
4.	Oxy Cream By Viprolabs	Clotrimazole
5.	Zuya Skincare Night Treatment A Cream	Merkuri

2. Notifikasi produk-produk kosmetik terlibat telah dibatalkan oleh Pengarah Kanan Perkhidmatan Farmasi, KKM. Oleh itu, produk-produk kosmetik tersebut tidak lagi dibenarkan untuk dijual di Malaysia.

**PERIHAL BAHAN RACUN BERJADUAL**

3. Produk yang mengandungi **clotrimazole**, **hydroquinone** dan **tretinoin** adalah ubat yang perlu berdaftar dengan Pihak Berkuasa Kawalan Dadah dan hanya boleh digunakan dengan nasihat profesional kesihatan. Penggunaan produk yang mengandungi bahan-bahan tersebut **tanpa pengawasan profesional kesihatan** boleh menyebabkan kesan-kesan sampingan yang tidak diingini seperti berikut:

- Anti-fungal (clotrimazole) yang diguna secara tidak terkawal boleh meningkatkan risiko kerintangan dan seterusnya mengurangkan keberkesannya untuk merawat jangkitan pada masa hadapan.
- Hydroquinone boleh menyebabkan kemerahan pada kulit yang disapu, ketidakselesaan, perubahan warna kulit yang tidak diingini, kulit menjadi hipersensitif, boleh menghalang proses pigmentasi (depigmentasi) yang mengurangkan perlindungan kulit daripada pancaran sinar UV merbahaya dan boleh meningkatkan risiko kanser kulit.
- Penggunaan tretinoin tanpa pengawasan profesional kesihatan boleh menyebabkan bahagian kulit yang disapu menjadi kemerahan, tidak selesa, pedih, mengelupas dan hipersensitif kepada cahaya matahari.

4. **Merkuri** dilarang di dalam produk kosmetik kerana boleh memudaratkan kesihatan. Ia boleh diserap masuk ke dalam badan dan menyebabkan kerosakan pada buah pinggang dan sistem saraf. Ia juga boleh mengganggu perkembangan otak kanak-kanak yang masih kecil atau yang belum dilahirkan. Merkuri juga boleh menyebabkan ruam, iritasi dan perubahan lain pada kulit.

#### **PERINGATAN KEPADA PENJUAL DAN PENGEDAR PRODUK KOSMETIK INI**

5. Penjual dan pengedar produk kosmetik ini perlu menghentikan penjualan dan pendedaran produk-produk kosmetik tersebut dengan serta-merta. **Penjualan dan pendedaran** produk-produk kosmetik ini adalah melanggar Peraturan-Peraturan Kawalan Dadah dan Kosmetik 1984.

6. Individu yang melakukan kesalahan di bawah Peraturan-Peraturan ini boleh dikenakan hukuman denda tidak melebihi RM25,000 atau penjara tidak melebihi 3 tahun atau kedua-duanya untuk kesalahan pertama dan denda tidak melebihi RM50,000 atau penjara tidak melebihi 5 tahun atau kedua-duanya untuk kesalahan berikutnya. Syarikat yang melakukan kesalahan boleh dikenakan denda sehingga RM50,000 untuk kesalahan pertama dan denda sehingga RM100,000 untuk kesalahan berikutnya.

#### **PERINGATAN KEPADA ORANG AWAM**

7. Orang awam yang sedang menggunakan produk-produk kosmetik ini dinasihatkan untuk segera menghentikan penggunaannya dan mendapatkan nasihat daripada ahli profesional kesihatan jika mengalami sebarang ketidakselesaan atau kesan advers.

8. Orang awam digalakkan untuk menyemak status notifikasi sesuatu produk kosmetik dengan melayari laman sesawang rasmi NPRA [www.npra.gov.my](http://www.npra.gov.my) atau melalui aplikasi 'NPRA Product Status' yang boleh dimuat turun daripada *Google Play Store*.

**Datin Dr Faridah Aryani Binti Md. Yusof**  
**Pengarah Kanan Perkhidmatan Farmasi**

**LAMPIRAN**

**Nama Produk: 1. Beauty Sleep Treatment Cream**




**Nama Produk: 2. Beauty Sleep Nite Cream**



**Nama Produk: 3. Lana Radiance Night Cream**



Nama Produk: 4. Oxy Cream By Viprolabs



Nama Produk: 5. Zuya Skincare Night Treatment A Cream

